

# Powšitkowne WOZJEWJENJA

njedźelu, 1. septembra 2024

## Swójbne popołdno w Radworju

Sekcija Swójba Towarstwa Cyrila a Metoda z.t. přepróšuje swójby na zabawne popołdno, kotrež wotměje so tutu njedźelu, 1. septembra, w Radworju. Spočatk budže w 14.00 hodž. z nyšporom we wosadnej cyrkwi. Přizamknje so wodženje po wsy z Benom Bělkom. Při tym rozloží wón fenomen, zo ma Radwor hnydom tři katolske cyrkwe, kotrež wosada tež prawidlownje wužiwa. Džěci móža sej při kwisu najwšelakoriše myta zdobyć. Po wodženju su wšitcy na swačinu na farje přepróšeni.

## Putnikowanje do Róžanta

Lětuše putnikowanje k swjedženjej Marije naroda do Róžanta budže njedźelu, 8. septembra. Boža mša na putniskej łuce zahaji so w 9.00 hodž.

## Modla so kadiš w Budyšinje

Na modlenje kadiš z kantorom Praskeje židowskeje wosady Michalom Forštom su zajimcy na Budyski židowski kěrchow blisko Mužakowskeje dróhi přepróšeni. Wone je tutu njedźelu, 1. septembra, w 17.00 hodž.

## Duchowna hudźba

Dalši nyšpor w rjedže duchowneje hudźby budže njedźelu, 1. septembra, we 18.00 hodž. w Budyskej tachantskej cyrkwi swjateho Pětra. Zaklinča mjez druhim wšelake twórby Samuela Capricornusa, Melchiora Vulpiusa a Philippa Heinricha Erlebacha. Wšitcy zajimcy su wutrobnje přepróšeni. Zastup je darmotny, po tym budže kolekta.

## Modlenje w Róžeńće

Na modlenje před Najswjećišim su wěriwi sobotu, 7. septembra, we 18.00 hodž. do Róžeńčanskeje hnadowneje cyrkwe přepróšeni. Pačerje budu w serbskej a němskej řeči spěwane.

## Zetkanje samostejacych

Samostejacy ze serbskich wosadow su na swoje přichodne zetkanje wutoru, 10. septembra, w 14.00 hodž. do Smochčanskeho kubłanišća swjateho Bena přepróšeni. Zajimcy njech so hač do wutory, 3. septembra, w redakciji Katolskeho Posoła přizjewja, telefonowe čisło (0 35 91) 55 02 12. Dalši zajimcy kaž tež ći, kotřiž njejsu samostejacy, su tohorunja wutrobnje witani. Kóždy njech sej Wosadnik sobu přinjese. Štóz chce wotewzaty być, njech to prošu zdžěli.

## Młodźina do Wechselburga

Lětuše diecezanske zetkanje młodžiny wotměje so pjatk a sobotu, 13. a 14. septembra, we Wechselburgu. Za serbskich wobdźělnikow budže składnosť, sej tam zhromadnje dojeć. Přizjewjenja přijimuje dekanatne dušepastyrstwo młodžiny hač do tuteje njedźele, 1. septembra, online.

## **Mandželski seminar**

Přichodny seminar k přihotej na sakrament mandželstwa budže pjatk a sobotu, 29. a 30. nowembra, w Smochčanskim kubłanišću swjateho Bena. Přizjewjenja su hač do tuteje njedžele, 1. septembra, online móžne.

## **Na zapokazanje kanonika Ščěpana Delana do Litoměřic**

Ralbičanska wosadna rada so wo to stara, zo by móhl na zapokazanje kanonika Ščěpana Delana sobotu, 28. septembra, bus do českich Litoměřic jěć. Štóz by rady sobu jěć chcył, njech so hač do soboty, 14. septembra, pak do lisčiny w interneće zapisa pak so wosobinsce pola Rafaela Ledźborja w Ralbicach přizjewi, telefonowe čisło (01 72) 7 87 33 41. Su-li wjacori w swójbje, kotřiž chcedža sobu jěć, njech so kóždy zapisa. Link za přizjewjenje w interneće je pod [www.posol.de](http://www.posol.de) podaty. Planowane je, zo wotjědže bus w 13.30 hodž. z Radworja a w 14.00 hodž. z Ralbic. W 17.00 hodž. je Boža mša ze zapokazanjom. Bus wotjědže drje zaso wokoło 20.00 hodž., tak zo změja wšitcy po kemšach trochu chwile něšto powječerjeć, a budže najskerje wokoło 22.00 hodž. zaso w Ralbicach a trochu pozdžišo w Radworju. Płaćizna móhła něhdže 28 eurow na wosobu wučinić, wotwisne wot toho, kelko ludži sobu pojedže.

## **Portretowy koncert w Kulowje**

Składnostnje 70. narodnin serbskeho komponista Ulricha Pogody wuhotuje orchester Serbskeho ludoweho ansambla (SLA) zhromadnje ze spěwnymi solistami a w Kulowje rodženym organistom Tomašom Žurom „Portretowy koncert za Ulricha Pogodu & Tomaša Žura“. Prěni budže sobotu, 7. septembra, w 19.00 hodž w Choćebuskim konserwatoriju, dalši njedželu, 22. septembra, w 16.00 hodž. w Kulowskej cyrkwi Marije donjebjeswzaća. Nimo třoch wulkich piščelowych twórbow zaklinča spěwy a orchestrowe twórby, kotrež su w minjenych 30 lětach nastali. Na piščelach budže organist Tomaš Žur hrać. Zastupne lisćiki dóstanu zajimcy na internetowej stronje (SLA). Link je pod [www.posol.de](http://www.posol.de) podaty.